

Anpezo Teufel

S'ha scomenzà co i prime dioule, drio San Nicolò, e ades se pensa de fei una manifestazion noa, da ciamà inze 'l paes ra sènte da fora



Ben da dioule, par piazza, canche 'l é ruà San Nicolò, co i so anjolete, dià da ra Union de i Ladis de Anpezo.

Ce burte, chi dioule! Ce bieì, chi dioule! Dute pensa ra soa, dute disc ra soa, su i dioule, che se vede par piazza, intor San Nicolò, i prime dis de dezenbre. Se sà che 'l é finamai ci che à festide, ci che se stremisce, a i vede, pi che see a i senti ruà. In Anpezo i à scomenzà 'l an pasà, a se mostrà nafré depì, 'ste dioule, de chi che se veda i anes ignante. El Santo de i pize 'l à senpre abù, so par pede, i so anjolete, ma 'l é senpre stà anche i dioule, nafré pi indalonse, mangare tegnude fora de ciaśa da i jenitore, che i pize i no se spašemase. Trope de nošoutre i à fato i dioule, da soen, par smatiśà, par stà aduna, šironà par ra ciaśes, s'in bee un goto. Chel che 'na ota 'l ea fato in pizo, intrà de amighe, mangare in širo par i vilaje, ades 'l é ruà inze piazza, fato polito, parecià cemodo che se disc, con chera de fei anche nafré de spettacolo, algo de bel, par el paes. Ai 5 de dezenbre, chi dioule i ea par piazza, in Anpezo, conpain de 'l an pasà, ma ancora depì, e pi bieì. I aea el fo, che ardea sora un caretel, ben da susuro, ciadenes, i tantesc, a sonà, o toche de banda, a sbatocià, e 'pò el fo, el fun. Sun testa i corne, se sà, che no pò ese outramente. E peles e pelizes, e scuriades sun man, e fazes che ruaa da 'l inferno. Chera fazes, trope i 's à fates, a lourà el len, a jaà e depenše, coscita burtes,

coscita beles. Dapò de aé fato un laoro cosci gran, no se pò se contentà de se mostrà 'na ota sola, e alora se se sposta, se và a vede chel che i fesc inze outre paes, ca pede, mangare chi de parlada todesca, agnó che i à 'na gran tradizion de i Krampus, cemodo che lore i ciama el nosc diou, el malan de ra vales ladines. Sabeda ai 8 de dezenbre, a Toblach, par ra sfilada de i Krampus, che rua da outre poste, da outra vales, 'l ea anche i Anpezo Teufel. Ra scritta r'ea su ra tabela, che portaa bela tośates, nafré diouletes anche eres, e 'pò i nostre, a fei nafré de jeste, par piazza, inze 'l paes vecio, su da ra jeja. De sfilades coscita, in Pusteria, in širo par el Tirol, s'in fesc pi de una, da anes. Ades s'ha chera de in portà una anche in Anpezo. Dinprin se pensaa de šì adora a ra fei 'sto an, ma co 'l é stà dinultima, i no n'ha podù. Coscita se varda pi inaante, a 'l an che vien, de 'ste dis, intrà San Nicolò e Nadà, ra prima setemanes de dezenbre. Par Anpezo sarae algo de noo, mai vedù ignante, drio chel che i fesc inze outre paes. Se fata polito, senza stranbaries, senza burte jeste, senza bee masa, podarae soutà fora 'na bela manifestazion noa. Tocia vardà drio polito, ra studià, ra parecià, i dà ra responsabilitàs a i soen, che i bete aduna dute i toche. Co i grei che i tende.

